

Anno dni. 1527 den 1 tag augusti ist unser gnädigste fraw königin des erstgepornen irer mäet sun zu Wien in der purg zwischen 11 und 12. zu mitternacht niderkumen, das hab ich k. Mäet ins feldlager gen altenpurg verkündt und das potenprot gewunen, und ist das kind durch bischof Christoffen von labach hie zu Wien in der capell in der purg den 5 tag augusti getoft und Maximilianus genent worden. peustent seyn gewest graf francz von posing, herr adam vom newhauss obrist canzler in Böhem und herr steffans von Banhor grossgrauen in Ungern gemachel, ain geporne herzogin, got der herr sey gelobt in ewikeit.

Anno Dni. 1529 den 23 tag septembris hat sich der türkisch kayser für die statt Wien geschlagen und 3 ganczer wochen pis auf den 14 tag octobris darvor gelegen mit aller seyner macht pis in 300000 stark und pin ich in solcher belegerung oberster profandmayster gewest.

Anno Dni. 1529 den 8 tag novembris ist gewest der montag vor martini gelag mein liebe hawsfraw martha irs dritten kinds umb 11 ur zu mittag, was ain knab, haisst leopoldus und ist zu münchen geporn und getauft worden, sein gött, der in aus der tauf gehabt haysst der herr hans hunger ain priester zu münchen. got hab lob.

Anno Dni. 1530 den 4 tag junii am heyligen pfingstabend ist obgemelter mein sun leopold zu münchen gestorben und liegt daselbst auf unser frawen gotsacker begraben. got helf uns allen.

Anno Dni. 1530 den 13 tag marcii, ist gewest der sonntag reminiscere hat mich die k. Mäet mein gnedigster herr zu prag zu Ritter geschlagen und hat mir in die ritterschaft geschenkt ain guldin ketten von 300 fl., ein kermesin atlas mit guldin thuech verprämbt und hermlin gefuert, auch mein leben lang 200 fl. R. W. sold verschrieben und mich und meyne nachkommen gefreyt mit rot zu siglen.

Anno Dni. 1531 den 12tag februarii gelag mein hawsfraw martha ires vierten Kindes zwischen 3 und 4 ur vor mittag, ist ain tochter und haisst Anna, die haben aus der toff gehoben herr Jobst Truchsass landcommentar tewtsch ordens, fraw barbara geporn von Rottal herrn Sigmunden von Dietrichstain etc. gemachel und fraw heydweyg geporne von eyczinger, herrn Rudolfs von hohefeld gemachel. got hab lob.

Anno Dni. 1532 hat der türkisch kayser in aygner person und mit aller macht ain zug in Oesterreich gethan, und sich den (9.) tag (Aug.) zu güns fürgeschlagen und darvor 25 tag gelegen, 16 mal gestürmbt, aber nit gewonnen, darnach hat er sein abzug für die newenstat uber den harperg und gen grätz genumen, daselbst sich 3 tag gelegert und nachmals auf marpurg gezogen, darvor ist er 6 tag gelegen, hats auch nit gewinnen mügen, also hat er ungethaner sachen, allain das er geprent und geraubt, abziehen muessen dan kayser Carol und künig ferdinandus seint mit dem reychs und anderm böhemisch und welisch kriegsvolk den 23 tag septembris desselbigen jars gen Wien ankumen, so stark, das